

長生殿裏舞霓裳  
卯酒酣眠七寶床  
晝漏遲遲花影轉  
可應無夢到漁陽

錢良用

字

竹枝詞

郎去遠遊江水清  
捲簾寫出無限情  
梨花半吐柳條碧  
燕子一雙相對鳴

陳山

字伯高號欣木  
瑤山縣知縣





賣田嶺行

賣田嶺頭路款曲賣田嶺頭車折軸前車已邁  
後車促僕夫倉惶仰天哭敗車欲寄斷人烟拋  
車驅牛歸更速到家賒酒倩車工賣田作車常  
不足寄語州中牧民父食祿須當恤民苦民家  
丁田籍官府徭役宜差買田主

金陵春曉

五更起坐候鳴雞王氣浮空曙色迷禁鼓聲殘  
銀漏急長河影落玉繩低內廷僊珮趨鵷序曲

巷香塵送馬蹄黃道已開紅日近萬年枝上早  
鶯啼

山水畫寄尹克順

積雨峯巒淡復濃懸崖飛瀑灑長松隔溪樹密  
深藏屋出岫雲多不碍鍾盤谷有誰尋舊隱天  
台無路覓僊蹤題詩明發璫州去馬首青山幾  
萬重

送柳機仲復任九江府經歷

驛路西風拂鬢毛離筵還送柳司曹無邊落葉



秋江闊何處砧聲夜月高堂下簿書間綠幕槐  
陰衙鼓肅青袍百花亭上公餘日應把春杯醉  
碧桃

竹枝詞四首

二八佳人雲錦衣顏色正當年少時閉門半月  
梨花雨從此傷春懶畫眉

賀監宅前湖水深來蓮人唱白頭吟翠房瑤寶  
在君手嫩藕細絲縈妾心

飛葉扇寫竹枝歌搖曳清江照翠蛾夾岸芙蓉

秋水澗薄暮雲生愁思多

長安城中花滿枝郎去看花須早歸不是高樓  
無酒喫只愁露濕阿郎衣

薛常生

字士容吏部考功郎中

遣興

幾度朝衣極隨班拜冕旒雲霞金闕曉風  
露玉階秋報國心長切傳經志未酬同年多宦  
達冠蓋擁皇州



青州道中二首

遠寺鐘聲動空庭月色寒  
懷人不可見寂寞倚闌干

遠道長為客寒宵夢到家  
故山風景好香雪壓梅花

雜興

絃歌清夜永風月小窓幽  
且盡百年醉何須千古愁

趙瑄

字德璋國子監學錄

屠士安松風軒聽徐仲穆琴

松風軒前月橫几夜半松聲聽焦尾  
坐中嘉客彈者誰孺子玄孫徐穆氏  
遐哉伯牙去幾年我適聽此心茫然  
瀟湘洞庭波浩蕩匡廬五老雲連綿  
調奏清商絃轉急屈指按徽遲更澁  
出壑寒泉咽竇鳴抱葉秋蟬迎露泣  
啾啾忽悲丹鳳雛落落又馮金盤珠  
鋼刀細琢石中璞西風乍脫林間枯  
人生百歲苦多慮機事即忘平宿怒



沉烟暗度四無言妙趣入神能靜悟高山流水  
不須尋默坐已符千載心子期雖遠琴還在稀  
世知音無古今

屠士弘

字 號霞林奉新縣知縣

大江舟中作

關下頌符手自賈之官今日上江西金山紫氣  
頻回首采石蒼厓欲紀題一鴈度空家信遠雙  
鵝拍浪櫓聲齊異鄉風景真奇絕日暮雲飛憶

會稽

宿虎丘寺

吳王臺沼梵王宮老衲迎人數霸雄石隱山精  
曾化虎池留劍影欲成龍江湖左右秋風棹今  
古興亡日暮鐘我赴京畿成夜宿酒酣揮灑氣  
如虹

葛隆

字宗旦號南陽又號默齋徵士

霜天曉角



烏啼月落天如洗  
霜花滿地角聲起  
晨光慘淡四無人  
一曲梅花吹未已  
黃雲捲地百草枯  
隴頭水咽聲嗚嗚  
聲嗚嗚何悲切  
行人夢斷關山月  
十年他鄉苦未歸  
聽得角聲更嗚咽

葉緯

字季書封松江府知府

樂遊圖

將軍閫外樂昇平  
春日郊原小隊行  
芳草有情皆避馬  
綠陰無處不聞鶯  
寸心戀闕常傾藿  
一

念憂民且問耕  
日暮笙歌歸院落  
照人涼月鎖空明

柳鶯春晝

細柳春光似酒濃  
綠陰深處隱歌鐘  
珊瑚柱上鶯聲滑  
翡翠簾前花影重  
萬馬不嘶聽令肅  
三軍無事樂時雍  
太平屢詔銷金甲  
坐看霜華蝕劍鋒

許昇

字士升號坦坡太常寺少卿



秋懷

西風長日倚荆扉為惜流光鬢漸稀  
兩岼黃蘆生暮靄幾村紅樹炫斜暉  
山中舊屋人空卧江上扁舟客未歸  
欲寫停雲無好句愁心空逐亂雲飛

陳氏幽居

陳氏幽居何處求清江一曲萬山稠  
路從谷口經重壑人到橋心見小樓  
花園春深紅雨落竹窓秋爽翠雲浮  
我生亦是林泉客他日還來覓

舊遊

徐穆

字仲穆號雅趣

蕭巡宰不繫舟

到處江湖可寄蹤一舟不繫任西東  
影隨鷗鳥浮沉外志在魚龍變化中  
治世已無浮海嘆長材應有濟川功  
銀河一夕秋波湧萬里雲帆逐便風

柳泰



字宗嶽歷城縣知縣

東城畫角

銀虬滴盡銅壺水曙鼓聲沉角聲起隨風吹月  
下西山喚出金烏海雲底龍吟秋浦老猿啼江  
梅亂落草萋萋七十樓前天地長壯士臨關氣  
慘悽向日蚩尤死涿鹿嶰管長吹鳳凰曲

任琦

字士奇給事中

寄吳道常

晨登鳳凰臺莫憇金陵道俯仰穹壤間萬物感  
懷抱嚶嚶鳥求友呦呦鹿得草物情出自然至  
理契玄造况予托交遊氣義期管鮑如何有乖  
離不獲終所好日月如逝川會合豈能保雲樹  
渺吳越相思托魚鳥

夏曄

字字中號居貞

寄葉履道時輸作晉陽轉戍隴右

故人輸作晉陽官萬里山河一信通共嘆遺珠



在滄海孰云長  
劍倚崆峒  
秋風絕塞隨征馬  
夜月深閨怨斷鴻  
借問漢家班定遠  
玉關歸路幾時東

賦夏蓋湖送薛將軍

大禹峯前蓋湖水  
三十六溝春正深  
飛花逐浪漲晴碧  
楊柳拂堤生晝陰  
臨流飲馬壯士志  
坐石觀魚幽客心  
不堪歸棹入城府  
回首暮雲凝碧岑

村田樂

歲晏三農息  
年登八蜡通  
酒酣群起舞  
人在泰和中

盧楷

字用端號端居桂平縣縣丞

寄遠曲

金風起白鴈飛  
賤妾有夫仍未歸  
深閨涼生秋氣晚  
中天月異砧聲斷  
銅壺滴下夜沉沉  
獨抱霜紉自悽惋  
燈前細意熨貼平  
一對鴛鴦落金剪  
裁縫便欲寄夫君  
起望關山路途遠  
路途遠



愁柰何夜寒手冷頻頻呵衣成寬窄誰能試謾  
想別來消瘦多封書寄與隣人去衣到還知歲  
云暮安得邊庭掃戰塵却著新衣就歸路

素鉉

字伯時太湖縣典史

曉出西郭

路入山陰道蒼茫雲水連青山環曉堞綠樹帶  
晴川楊柳人家屋蕪葭水檻船相過感疇昔回  
首意茫然

素鉉

字伯貞號雪洞

漫興

清霜侵短髮涼思入吟袍海濶鷗盟冷天空鴈  
影高簞瓢甘淡泊杖屨任遊遨日暮門先掩松  
聲落翠濤

陳謨

字秉文鎮江府學訓導

魏仲遠竹深軒



竹近疑居僻林深覺路賒  
撲簾蒼雪墮排戶碧雲遮  
雨過琅玕長風翻翡翠斜  
秋聲喧鳥雀月色動龍蛇  
每拄僊人杖頻留逸士車  
主人今不見令我起長嗟

趙純

字本純號芸軒

菜

昨夜中畦一雨新  
紺茅青葉總回春  
如何飽飫膏梁者  
不念街衢菜色人

吳昌

字文昌涑水縣知縣

寄外父宋瑩菴謫戍北平

憶自江橋別侵尋又八春  
感時雙淚墮愆愆天書頻  
片嶼黃塵靜風霜白髮新  
寵榮猶幻事寧落百年身

新晴晚步

天際濕雲收乘開出郭遊  
好山堪倚杖新水可通舟  
深樹啼黃鳥晴沙卧白鷗  
物情欣自得吾



意復何求

朱瑾

字懷玉莊浪縣知縣

采蓮曲

若耶溪頭新過雨  
婉婉芙蓉嬌欲語  
深閨思婦正含愁  
共泛蘭舟度烟渚  
紅粧映水爛明霞  
爭前競折雙頭花  
玉纖斜綰藕絲斷  
綠雲半鞦翠蓋遮  
花容自愧人難敵  
欲寄相思川路隔  
棹歌一曲起中流  
鷺散沙頭兩鷓鴣

盧英

字叔英號蕙庵

重陽感懷

客窓涼冷菊花天  
物色蕭條異去年  
鏡裏漸添新白髮  
座中猶守舊青氈  
杜陵謾有驚人句  
陶令曾無買酒錢  
二老風流今已遠  
晚庭獨立一茫然

范仲彭捕魚圖

汀樹離離接遠灘  
漁舟兩兩出前灣  
不憂妻子



生涯薄自信烟波到處間野店酒香時取醉江  
村月落夜忘還知幾獨有玄真子千古高風落  
世間

盧槃

字用銘號菊菴

舟次淮安值雨感懷

深秋風雨暗長空離思綿綿轉覺濃千里親闈  
雙鬢雪百年心事五更鐘生來似恠詩成癖老  
去全憑酒借容東望家山渺何許暮雲疊疊水

重重

杜矩

字方叔

擬古

鳳凰不自銜棲息梧桐枝一飛九千仞文采天  
下竒山鷄照綠水顧影珍羽衣於焉目眩暈至  
溺不復疑

薛才用

字文舉號訥齋太常寺博士



劉坦之謝元功同會徐永年宅分韻得  
遇字

清晨出郭門去去南郊路良友久別離胡為一  
相遇置酒燕高堂魚鮮美殺具酣歌且為歡白  
日倏已莫人生誠幾何奄忽若朝露頭言崇令  
德永以保終譽

謝澤

字時用號雪舟通政使

陳公貴水西莊二首

結構交平疇開軒見新綠山中昨夜雨清溪漱  
鳴玉二變喜新收家家餅餌足呼酒覓東隣共  
唱南風曲

賦稅喜新足燕集皆良儔寒天苦日短夕陽滿  
西樓山中有松栢藹藹連雲稠願托歲寒契永  
遂林泉幽

瓔珞漁洲

沙明水淺絕纖塵洲上漁家自結鄰祇為滄浪  
多樂事不教名利絆閒身黃蘆碧樹孤村曉翠



柳紅桃兩岸春幾度醉眠人不到忘機鷗鳥日  
相親

題屠子固遊春圖

春來何地最堪遊隱士園林處處幽草色凝烟  
通小徑桃花夾岸繞清流好將逸興聽黃鳥不  
但忘機對白鷗若許扁舟遠相過一尊濁酒謾  
賡酬

江南意

莫向江邊賦采蘋江深無處覓湘神自從夫婿

長安去窓下菱花暗照人

屠奮

字子固號靜齋

送單公懌還東陽

送客縣城南春風酒半酣別愁鶯喚起歸路馬  
能諳花曉擣香露山晴漲翠嵐蓬門懸榻在何  
日更清談

題葡萄圖

虬珠聯蔓露華乾陰覆庭除生夏寒昨夜碧空



明月上誤教人作水晶看

范寧

字宗謚號素庵

雲山圖二首

峩峩江上山歷歷灘頭樹茅屋間無人白雲自  
來去

雨過蒼崖濕雲歸綠樹涼草堂人不見流水自  
斜陽

清河值雨

棹泊清河暝色深客懷牢落正難禁不堪半夜  
蓬窓雨滴碎思鄉一片心

尹璣

字孟璣號自省

泊孟子河

孤舟千里道旅泊對斜暉潮落江聲急天高月  
色微漁燈依柳渚村遠起柴扉忽動鄉關思淒  
風薦客衣

許曾



字公望號心古昇之子

陳公貴水西庄

別墅意何窮  
漚波繞屋東  
晚窓先得月  
春箔早迎風  
蚕長桑畦綠  
蜂喧藥圃紅  
幽棲憐此地  
應與午橋同

旅懷

客子違家久  
空庭坐漏深  
野寒蟲近砌  
風動葉辭林  
夜色千門月  
秋聲幾處砧  
寒裳欲長望  
川靄碧沉沉

和吳孝文留別韻

溪口紅亭是  
去程撫時傷  
別感人情平  
生分義千金重  
浮世功名一羽輕  
晴靄遠籠汀  
樹淡夕陽斜  
照水光明新  
秋何處聞消息  
霜冷南天白  
鴈聲

送劉汝寧遊吳

杏花零落鳥關關  
君去吳門春正殷  
綠樹人家多近水  
白雲僧寺半依山  
長洲苑外風光舊  
陸羽泉頭野興閒  
休謂異鄉饒景趣  
片帆江上却



遲還

張輝

字士素號岫雲從祀鄉賢

俞漢遠山水

春雨夜來敲石林春泉暗添三尺深波光冷浸  
水樓靜嵐影暖蒸山寺陰徑苔斑斑石痕少岩  
花寂寂鍾聲杳幽人高卧日三竿門外鶯啼猶  
未曉屋後群峯如畫屏屋前流水鳴瑤箏綠樹  
風輕鳥聲碎丹壑雲埋龍氣腥踈窓酒酣春霧

碧古鼎茶香午烟白隔溪茆屋兩三家盡與山  
翁看仙奕

冬夜曲

朔風獵獵號古木暝禽聲斷哀猿續城西野人  
愁未眠月白霜清恨幽獨銅荷燼落寒無光獸  
爐坐撥龍團香彷彿樓頭叫孤雁聽此令人空  
斷腸玉漏沉沉靜如洗無限離愁吟不已珍重  
梅花似有情暗過清香滿書几

題諸葛侍御山莊



湖上幽居倚翠岑繞簷松竹畫生陰沙鷗睡起  
忘機甚山鳥飛來得意深梅月半窓兒讀易竹  
風三徑客携琴朝簪擲却歸來日許我扁舟載  
酒尋

秋曉

白月初沉畫角殘海雲扶日上雕闌井梧滴露  
渾疑雨籬菊凌霜不畏寒獨雁數聲雲外聽  
葉一簇酒中看緣知金鎖長楊客已逐雞聲促  
去鞭

蘆鴈為錢懋題

一聲啼破塞垣秋依約西風愜舊遊吳水正清  
吳稻熟不妨樓老荻花洲

山水圖二首

野水微茫接遠村隔林黃葉護柴門夜來一雨  
曉初霽山色新添八九分

雨後峯巒翠欲流石林茆屋近溪頭讀書人去  
陳時事閒却煙波一釣舟

張居傑



字翰英號澹庵山西左布政使

題釣魚圖

隱居崇令德軒冕非所歡超然脫塵鞅不為榮  
辱干於馬獨垂釣棲息宜遊盤滄江渺烟波寸  
心天地寬清風渭川渚明月嚴陵灘誰為後來  
者此節無凋殘

肥城即事

古來肥子國今到幾更遷民性超齊俗封疆接  
魯田成樓遺落照寒鴈唳遙天不見觀風使徒

聞長吏賢

湖曲草堂

築室瀕湖曲青蓮喚碧波地偏行迹少林靜落  
花多門外開天鏡窓前長薜蘿杜陵千載後重  
賦草堂歌

寄凌都御史晏知

清朝經國彥盛世濟川才敵納更三聖褒揚佐  
內臺霜稜飛象簡豸角肅風裁一鷲橫霄漢羣  
狐避草萊威名紛震懾德望絕疑猜共羨鍾王



律咸推董賈才起疴惟藥石調鼎屬藍梅青瑣  
蒙深眷彤輝得屢陪笑談真脫畧點檢獨遲迴  
劔佩辭東省星辰拱上台邇分仙鷲序竟入瘴  
烟堆內苑鶯聲轉炎方鴈不來音書終歲隔懷  
抱幾時開每憶頻聯句何由共舉杯風晨徒悵  
快月夕獨徘徊出處隨吾分芳心未肯灰

夜坐

露下高梧夜氣清山居寂寂感平生還鄉未遂  
揮金樂夢省猶慙衣紫榮紙帳梅花孤榻靜紗

厨銀燭小窻明堦前步月瞻河漢北斗低迴近  
鳳城

桂林書屋為章考功賦

亭亭丹桂護幽居滿室清風辟蠹魚風裏傳香  
來几席月中分影落圖書先生芸閣清無際陰  
覆絲桐潤有餘已見流芳天闕上至今輝映

舊林墟

張居彥

字翰華號樂菴福建按察司僉事



舟中寫懷

老畏年華暮愁深髮雪多浮名秋草露歸思大江波  
舊恨憑詩遣衰顏藉酒和故鄉無限樂歸去着漁簑

張崑

字廷瞻荊州府知府

五松暮歸書懷

夕陽下西嶺款段行何遲高林鳥雀喧深巷牛羊歸  
羣物各有識食息恒及時而我遊觀徒進

止殊未知如何衰暮年營營尚奔馳賢哉柴桑翁  
高風尚爾遺我歌聊自適觴咏以為期

和葉郡守拱辰暮春之作

日斷停雲思惘然對春常是為春憐水流花謝  
驚三月燕語鶯啼又一年海若有靈皆效職郡公  
無事只高眠寸心清苦平生志况是南陽有薄田

題夏仲昭竹

曾作瀟湘萬里遊夜深風雨在孤舟回來又得



看圖畫滿地碧雲都是秋

陳金

字汝礪廣西左布政使

太廟陪祀有作

虎衛齋宮靜龍軒輦路長曉霞含月色宿靄散  
天香受胙先群辟祈年及萬方 聖心終有感

宗祝日輝光

使安南天使館述事

壯年有志慕終軍萬里南交策使勲星旆帶來

天漢雨馬蹄踏破越山雲恩懷

帝德時消武

化彼華風俗尚文賓主自知無物議夜幃孤館  
對清燠

送葛侍御蒙吉金壘歸隱

彭澤歸來興已幽更從何處寄風流東山夜月  
還巢鶴鏡水波空落野鷗栢府佳聲稱往日棠  
陰遺愛邁前修故鄉此去梅花發為折高枝慰  
遠遊

徐松



字喬年按察司僉事

遊塔山寺

兩江如線遠松關中有招提幾往還喬木春深  
黃鳥並危磯風靜白鷗閒定回鍾送梅湖月興  
盡舟歸剡水灣試問謝安高卧處老僧遙指鷓  
江山

夜坐有感

寒夜迢迢夢不成藤床獨坐向天明自嗟短髮  
如霜白誰識閒心似水清萱草堂陰憂日短芝

蘭庭下待春榮

聖朝濟濟夔龍盛抱膝山中

媿此生

羅王

字懷玉號商園

旅次送人

歲晚苦行役相逢雨雪中明朝孤棹別今夜一  
燈同華髮悲清鏡浮蹤逐轉蓬悠悠江海上不  
及附冥鴻

山行



雲氣風中散山光雨後微松晴雙鶴去溪晚一  
僧歸徑滑梅苔古林香草木菲不因行樂趣那  
解息塵穢

徐心

字彥誠號竹溪

九日感懷

歎息山中事業荒西風回首思茫茫年過半百  
頭空白節到重陽菊未黃有酒難同兄弟樂無  
家猶為子孫忙愁邊意緒知多少默倚欄干數

鴈行

謝珮

字廷用號琴趣

秋景畫

薄雨空濛歛翠微夕陽江上白鷗飛漁郎慣識  
風波險潮未來時撥棹歸

春草

綠滿平原處處春好風甘雨一時新王孫去後  
無消息空自萋萋恨遠人



張鉞

字廷揚號蘿厓

卮山草舍野語

覆卮山前溪水綠覆卮山後雲滿谷谷南溪北  
數椽屋屋裏有書書可讀老翁鋤地種蘆菘老  
嫗携筐采野菊小兒開門放鷄畜大兒刈草飯  
黃犢春來桑上催布穀秋後縣中輸稅粟百年  
歡聚親骨肉一生不知榮與辱早起夜眠貧亦  
足

范升

字士升號宜休會昌縣學教諭

棲鳥曲

荒林葉落寒枝低飛鳥歸來無處棲洛陽城中  
有高樹翻短力衰飛不去

李夫人歌

紫皇宮裏寒漏遲方士設宴張羅幃酒肉馨香  
燈燭輝芳蕙冉冉來因依帝居別帳遙相窺花  
容玉貌真絕竒就之不得心愈悲是邪非邪那



可知

金山別墅

高士棲身何處安  
山居殊勝市朝寬  
一灘烟水春雲碓  
半畝絲蘿罨藥欄  
花徑雨餘春屐煖  
竹窓風動夜床寒  
坐來頻起田園念  
便欲從君早挂冠

黃竹子歌

江邊黃竹子  
裊裊拂青天  
行人休斫取  
留待繫郎船